

# 1 Yohanis

## *Horok Lirna La'an*

Ri Kristen man minle nonolu ra'aheni ri ma naran Yohanis man hi'i horok eniyeni, la lere an hi'i horok eni minle nin kota Epesus. An aku horok eni laa ri Kristen na'akeme man minle propinsi Asia Tatane. Lere an hi'i horok eniyeni ai na'ileheredi me'e.

Lere Yohanis hi'i horok eni, meser agame nam-mori aile man wakuku ha ma ka namlolo. Hi ra'aheni Kristus ka namwali ri morimori ma nad-edem naise maika, maa Ai namwali roh mehe, de ha ma namwali noro ri kemen kan min haida. Hi ra'aheni lo'o ik hi'i ha man ailanna, onne kan min haida ono ik kemen mehe man ailanna. Yohanis na'aheni rir wanakuku onne na'akeme sala wake'e! Ai na'aheni Yesus namwali Makromod Lalap Ananne, la namwali ri mormori naise maika, la Ai kemen naise ik kemen haenhi. Lo'o ik kauroin Makromod Lalap kokkoo ik teunohi Nin hini'i wenewhe, de kak hi'i dohohala, maa ik lernohi Nin keneri hono'ok man hopon ik ida ma naramyaka ida.

Yohanis hi'i horok eniyeni leke ri ma akin naili'il Makromod Lalap Anan rauroin kokkoo hir lernaledi or'ori dardari ma kan horu (5:13). An horok panaeku namehin ma na'alapa ik akin haenhi leke ik kauroin kokkoo ik kamwali Nin ri (2:3, 5-6; 3:10, 14, 24; 5:11-12, 18-20). Ai na'aheni lo'o ik akin naili'il ik Makromod Yesus, ik ka kamka'uk kamriri lolo Makromod Lalap leken kalarna (2:28; 3:19-22; 4:16a, 17-18; 5:14).

*Horok Ihin*

1. Yohanis nala wanakunu man hari horok eni (1:1-4).
2. Ik min lolo Makromod Lalap Nin Ropropo raram (1:5-2:27).
  - a. Lo'o ik kauroin Makromod Lalap, ik kak minle noho momohon la ik hi'i wewehe Nin keneri hono'ok (1:5-2:17).
  - b. Ik akin naili'il Yesus, de kauroin Ai penia man Makromod Lalap kikan namwali Rai laa ewi-ewi (2:18-27).
3. Ik kamwali Makromod Lalap ananhe (2:28-4:6).
  - a. Iknik morimori ka namnehe noro Hayakyak Makromon nin ri (2:28-3:24).
  - b. Ik kauroin Yesus ma namwali Rai laa ewi-ewi, namlolo kokkoo namwali ri mormori la Ai kemen naise ik kemen haenhi (4:1-6).
4. Ik akin naili'il Makromod Lalap, la ik kauroin Ai penia raramyaka onno (4:7-5:12).
  - a. Ik ida ma naramyaka ida (4:7-5:5).
  - b. Ik akin naili'il Yesus de kauroin Ai onne Makromod Lalap Anan man maki leke nala morimori man ma'aruru wake'e maika (5:6-12).
5. Yohanis konohi horok eniyeni nin panaeku (5:13).
6. Yohanis nala wanakunu man horu (5:14-21).

*Lira ma nala or'ori dardari*

<sup>1</sup> Horok eni ihin na'ono Lirna ma nala or'ori dardari man ailedi nano nonolu wake'e lere noho eni ka namwali makun. Am dervedi Ai ma namwali Lirna onne la modi ai makam do'onedi la tukuledi Ai me'e. Ai onne Yesus Kristus, Lirna ma nala or'ori dardari eni. <sup>2</sup> Or'ori dardari onne maiyedi

noho wawan, la am do'onedi me'e. Onne peni ai mamwali man kuku maka Ai ma nala or'ori dardari ma kan horu eni. Ende am konohi mi inhawa man nonolu am dederne la dodo'on eni. Nonolu Ai ma nala or'ori dardari eni minwuku noro Aman, maa lere eniyeni hariyedi mayai me'e. <sup>3</sup> Am konohi mi hahaa na'akeme man am do'on la derne, leke lere eniyeni mi moro mayai minwuku kodi honorok aki mahaku la kauroin wewerre hi'ihewi ik koro iknik Ame noro Anan Yesus Kristus moriwuku wawa'an. <sup>4</sup> Am hi'i horok eniyeni leke ik na'akeme akin nahuwa'enedi kokkoo.

### *Makromod Lalap siksik lerlere*

<sup>5</sup> Lira man am dederne nano Ai eni, am loikaru ki mi. Nou eni na'aheni, "Makromod Lalap onne penia siksik lerlere, la lolo Ai onne ha man metmetek kalkala ida kaale."

<sup>6</sup> Lo'o ik ka'aheni, "Ik koro Ai moriwuku wawa'an," maa ik mori aile metmetek kalkala raram makun, ik mehe wukupohedi ik me'e lolo iknika wanakunu noro iknike hini'i wenewhe.

<sup>7</sup> Lo'o ik mori mamani lolo ropropro raram naise Makromod Lalap aile lolo ropropro raram mamani, ik ida man mori wawa'an noro ida, la Makromod Lalap Anan Yesus rarna na'amouwedi ik honorok akin nano dohohala na'akeme.

<sup>8</sup> Lo'o ik ka'aheni iknik dohohala kaale wake'e, mehe kapohedi ika me'e, la ka kauroin panaeku ma namlolo lolo Makromod Lalap kalarna.

<sup>9</sup> Makromod Lalap namkene hi'i Nin nou la hi'i ha ma namlolo mamani, de lo'o ik konohi mouropo iknik dohohala Makromod Lalap, Ai na'ohu nahala iknik dohohala, la na'amou na'adewe ik honorok akin nano hini'i wenewhe man sala

na'akeme. <sup>10</sup> Makromod Lalap na'ahenyedi ri morimori na'akeme hi'iyedi dohohala, de lo'o ik ka'aheni kak hi'i dohohala, onne nin panaeku ik ka'aheni Makromod Lalap ma napoho. Enla Ai Lirneni kan minle ik raramne.

## 2

### *Makromod Kristus ma na'ohu ma nahala*

<sup>1</sup> Ya an'u na'ahoruwedi man ya aramyaka, ya'u aku horok maiyala ki mi leke yon mim hi'i dohohala, maa lo'o rin hi'iyedi dohohala, yon mamka'uk ono iknik Man Hemen Lira aile. Ai onne Yesus Kristus man akin mou la namdudu, la Ai mehe nodiyala ika lolo Aman kalarna. <sup>2</sup> Yesus Kristus onne penia maki nahinerre ika, de na'ohu nahaledi iknik dohohala noro idewe ri mormori noho wawan na'akeme rir dohohala.

### *Lernohi Makromod Lalap Nin keneri hono'ok*

<sup>3</sup> Tanada ma na'aheni ik kauroiroin Makromod Lalap kokkoo hi'i heheni: Lo'o ik kauroiroin Ai, ik derne kakani Nin keneri hono'ok. <sup>4</sup> Inhoi na'aheni, “Ya auroiroin Makromod Lalap,” maa kan derne nakani Nin keneri hono'ok, ai napoho la panaeku ma namlolo kaale raramne. <sup>5</sup> Maa, inhoi man derne nakani Makromod Lalap Lirna mamani, ai onne naramyaka Makromod Lalap kokkoo. Ya'u konohi hi'ihewi ik kauroin ik moriwuku wawa'an noro Makromod Lalap: <sup>6</sup> Lo'o ik ka'aheni ik koro Makromod Lalap moriwuku mamani, iknik morimori lernohi Makromod Kristus Nin morimori haenhi.

*Keneri hono'ok worworu eni hopon ik ida ma naramyak ida*

<sup>7</sup> I wal'u na'ahoru man ya aramyaka, keneri hono'ok man ya'u horok lolo eniyeni, ka namwali ha man worworu, maa mim dervedi onne nano lere nonolu me'e.

<sup>8</sup> Enimaa, keneri hono'ok lo'olo'ol onne, naise worworu haenhi. Ik kauroin keneri hono'ok eni namwali kokkoo lolo Makromod Kristus Nin rarmyaka man lap, noro idewe lolo iknik rarmyaka haenhi ono ika ida ma narmyaka ida. Nonolu mim hi'i dohohale mamani, maa lere eniyeni mim lernohi Makromod Yesus ma namwali ropropo. Ende metmetek kalkala na'akeki molu la ropropo ma namlolo maiyedi me'e.

<sup>9</sup> Lo'o ri aile ma na'aheni, "Ya'u mori lolo ropropo raram," maa kan suk walin ma akin naili'il enihe, ai onne holiholi aile metmetek kalkala raram makun. <sup>10</sup> Inhoi narmyaka lodon walin, ai onne holiholi aile ropropo raram la haida kaale ai raram man hi'i ri onne nadiyaur dohohala. <sup>11</sup> Maa, inhoi kan suk lodon walin, ri onne holiholi aile metmetek kalkala raram makun. Ai onne lalaa mamai lolo metmetek raram de ka nauroin kalla ma namlolo ono metmetek kalkala onne hi'ie kan do'on haida-haida.

<sup>12</sup> Ya an'u na'ahoruwedi, ya'u hi'i horok eni ono Makromod Lalap na'ohu nahaledi minim dohohala lolo Makromod Kristus kemen me'e.

<sup>13</sup> Mi ri leleher enihe, ya'u hi'i horok eni ono mi mauroin Ai Man Aile. Ai onne noho ka namwali makun, aiyedi me'e.\*

---

\* **2:13** Makromod Lalap noro Anan noro Roh aile mamani nano nonolu, lere eniyeni, laa ewi-ewi. Rir lere ma namwali noro man horu kaale ono aile mamani.

Mi ma ka na'ileher makun enihe, ya'u hi'i horok eni ono mim rehiyedi Hayakyak Makromon me'e.

<sup>14</sup> Ya an'u na'ahoru, ya'u aku horok eni ki mi, ono mi mauroin ik Amad kokkoo.

Mi ri leleher, ya'u aku horok eni ki mi, ono mi mauroin Ai man ailedi dedesne me'e.

Mi ma ka na'ileher makun, ya'u aku horok eni ki mi, ono mi akim naruri, de lernohi Makromod Lalap Lirna Wawan mamani, la mim rehiyedi Hayakyak Makromon me'e.

### *Yon maramyaka noho wawan nin hahaa*

<sup>15</sup> Ende yono maramyaka noho wawan eni me hahaa na'akeme man aile noho wawan. Inhoi ma naramyaka noho wawan eniyeni, ka naramyaka ik Amad. <sup>16</sup> Noho wawan eni nin panaeku na'akeme ailanna wake'e, naise: ri man lernohi rir suk aimehi, ri man po'on la namone, la ri man suk holi kukulu lapa. Panaeku onne na'akeme kan lernohi ik Amad, maa lernohi noho wawan nin suk mehe. <sup>17</sup> Noho wawan noro nina hahaa na'akeme na'akeki horu me'e, maa ri man lernohi Makromod Lalap honorok akin, an lernala or'ori dardari ma kan horu laa ewi-ewi.

### *Makromod Kristus Nin arwali*

<sup>18</sup> Ya an'u na'ahoru, ik wakuraniyedi lere alam man horu me'e. Nonolu mim derne nahenia Makromod Kristus Nin arwali mai, la ors eniyeni Nin arwali nammori maiyedi me'e. Onne namwali tanada nahenia noho nin lere alam man horu wakuraniyedi me'e. <sup>19</sup> Ri ma kan suk Makromod Kristus onne rahinuriyedi maika me'e, ono hi onnenihe, iknik muku ka. Lo'o hi onne iknik ri, hi ka rahinuri nano maika. Onne namwali tanada

nahenia nano hi onnenihe ri mahaku ka namwali iknik muku.

<sup>20</sup> Enimaa mim kokaledi Makromod Lalap Nin Roh nano Makromod Yesus Kristus man moumou dewdewe, de mi mauroin wanakuku ma namlolo.

<sup>21</sup> Ende ya'u hi'i horok eni ki mi, ka a'aheni ka mauroin wanakuku ma namlolo makun, maa ya aheni mi mauroinedi me'e, la mauroin wanakuku onne namlolo mamani, <sup>22</sup> maa ri ma napoho aile. Ma napoho onne ra'aheni, "Yesus ka namwali Kristus man Makromod Lalap kikanedi namwali Rai laa ewi-ewi eni." Ri onne penia Makromod Kristus Nin arwali, la ka nauroin Aman noro Anan. <sup>23</sup> Ri ma ka nauroin Anan, ai onne ka nauroin Aman haenhi, maa ri man kokala Anan, ai onne kokala Aman haenhi.

<sup>24</sup> Ende, na'akeme man mim dernedi nano nonolu eni, madiyahaka wawa'an lolo mi akim. Lo'o mim loi honorok wawa'an, mi moro Aman noro Anan moriwuku wewerre. <sup>25</sup> Enla Makromod Kristus Nin nou eni na'ahenia Ai naledi maika or'ori dardari ma kan horu eni.

<sup>26</sup> Ya'u horok eniyeni ki mi, ono ri aile ma nahehe paipudi mi. <sup>27</sup> Maa, Makromod Kristus huri waliyedi Nin Roh mi akim me'e, de Nin Roh aiyedi mi raram me'e. Nin Roh penia wakuku mi panaeku na'akeme, de lo'o ri man wakuku mi kaale, kan hi'i haida, ono panaeku na'akeme man Roh Kudus wakuku mi, onne namlolo kokkoo, man sale kaale. Ende moriwuku noro Makromod Kristus, naise Nin Roh wakukuwedi mi me'e.

<sup>28</sup> Ya an'u na'ahoruwedi, moriwuku noro Makromod Kristus, leke rakan Nin lere alam mamai eni yono ik kamka'uk, la rakan lere onne ka kawawa karpali Ai, la ik akin namkene. <sup>29</sup> Mi

mauroinedi me'e Kristus Nin morimori namlolo, de mi mauroin haenhi inhoi nin morimori namlolo, ai onne namwali Makromod Lalap anan.

### 3

#### *Kamwali Makromod Lalap anan*

<sup>1</sup> Po'onala! Iknik Pape naramyak maika rehi, penia napolu ma'ike ananne. Memen Makromod Lalap anan ika! Noho eni wawan ka rauroin maika, ono ka rauroin Makromod Lalap. <sup>2</sup> I wal'u na'ahoru man ya aramyaka, lere eniyeni ik kamwaliyedi Makromod Lalap anan me'e, maa ik ka kauruin makun ik kemen naise inhawe lere Yesus Kristus mai wali'ur. Enimaa ik kauruin nahenia lere onne ik kamwaliyedi naise Yesus, ono namlolo kokkoo ik do'on la kauruin Ai. <sup>3</sup> Inhoi akin naili'il nahenia lerida Yesus wali mai, ai onne nadiyahake kemen leke yon hi'i dohohala, la ai akin mou lolo Makromod Lalap kalarna naise Kristus.

<sup>4</sup> Ri man hi'i dohohala larlewenedi Makromod Lalap Nin keneri hono'ok, ono dohohala penia larlewen keneri hono'ok onneni. <sup>5</sup> Mi mauroinedi Makromod Kristus mai leke na'ohu nahala ri morimori rir dohohala na'akeme. Lolo Kristus onne dohohala ida kaale. <sup>6</sup> Ende ri na'akeme man moriwuku noro Makromod Kristus kar hi'i dohohala mamani, maa ri man hi'i dohohala mamani, kar do'on la ka rauroin Ai.

<sup>7</sup> Ya an'u na'ahoru, yono rin paipudi mi. Ri man lernohi Makromod Lalap Nin honorok aki, ai onne nin morimori moumou dewdewe naise Makromod Yesus Nin morimori. <sup>8</sup> Maa ri man hi'i dohohala mamani, ri onne Hayakyak Makromon nin ri, ono nano dedesne me'e Hayakyak



Makromon hi'i dohohala mamani. Enpenia Makromod Lalap Anan mai leke na'amoluloinedi Hayakyak Makromon nin hini'i wenewhe onneni. <sup>9</sup> Inhoi namwaliyedi Makromod Lalap anan me'e, ai ka nadedem hi'i dohohala, ono Makromod Lalap Nin morimori namkene lolo honorok akin. Honorok akinne kan hurinohi ai hi'i dohohala ono Makromod Lalap namwali Aman. <sup>10</sup> Enpenia nano kalla eniyeni ik kauroin inhoi namwali Makromod Lalap anan la inhoi namwali Hayakyak Makromon anan. Inhoi kan hi'i wewhe lernohi Makromod Lalap Nin honorok aki, la ka naramyakala walinhe, ai onne Makromod Lalap anan ka.

*Ida ma naramyaka ida*

<sup>11</sup> Lira man mim dervedi nonolu hi'i heheni: Ik ida ma naramyak ida. <sup>12</sup> Yono kaise Kain. Ai namwali Hayakyak Makromon anan, de mehe nesne mo'oniwalla mememen. Inhawa nakoko penia nesne waline? Ai nesne walin, ono nin hini'i wenewhe ailanna, la walin penia namlolo.

<sup>13</sup> Ende I wal'u na'ahoru, lo'o ri morimori noho wawan kar suk mi, yon hehel. <sup>14</sup> Ik kauroin na'aheni nonolu noho makmaki nodi molollo maika, maa ors eniyeni ik lernaledi morimori ma kan horu me'e. Ik kauroin onne ono karamyaka ik walinhe. Ri ma ka naramyaka walinhe, ai onne noho makmaki nodi molollo makun. <sup>15</sup> Ri ma kan suk walinhe, ai onne ma nesne ri mormori. Mi mauroin nahenia ma nesne ri mormori kan lernala or'ori dardari ma kan horu.

<sup>16</sup> Enpenia ik kauroin raramyaka ma namlolo, ono Yesus nala kemen maki leke yon ik lernala dohohala nin hunukum, de ika ida ma naramyaka

ida naise Yesus naramyak ika haenhi. Wa'an rehi ik kamkene paku ik walinhe, kade ik maki haenhi. <sup>17</sup> Inhoi nin hahaa aile la do'on wal-inhe na'alehe haida-haida, maa namhene paku, ai onne na'alehe molollo na'aheni ai naramyaka Makromod Lalap noro ri namehin!

<sup>18</sup> Ya an'u na'ahoru, yon karamyaka ri lolo ik nuran mehe, ee lolo wanakunu mehe, maa ik karamyaka ri kodi honorok aki man moumou noro hini'i wenewhe man wa'an.

*Ik akin namkene lolo Makromod Lalap kalarna, horo ik karamyaka ik walin*

<sup>19</sup> Lo'o ik karamyakala ik waline, onne namwali tanada nahenia ik kamwaliyedi Makromod Lalap anan ma namlolo me'e, la ik akin ka namka'uk lolo Makromod Lalap leken kalarna.

<sup>20</sup> Lo'o ik karamyaka ik walin naise onne, maa ik akin nado'o makun na'ahenia, "Hi'ihehewi Makromod Lalap raram nodi nala ampun maika?" Yon ik derne kakani ik akin, maa ik derne kakani Makromod Lalap mehe, ono Ai penia ma nauroin narehi nalewen ik akin, la nauroin panaeku na'akeme.

<sup>21</sup> Ende i wal'u na'ahoru man ya aramyaka, lo'o ik akin ka nado'o naise onneni, ka kamka'uk kappali Makromod Lalap. <sup>22</sup> Enla inhawe ik kapanak Ai, ik lernala ono ik lerno hi Nin keneri hono'ok noro hi'i ha ma nahuwa'an Ai akin. <sup>23</sup> Keneri hono'ok man Ai nala maika onneni hi'i heheni: Ik akin naili'il Anane Yesus Kristus noro idewe ika ida ma naramyaka ida, naise nonolu Kristus komderedi ika me'eni. <sup>24</sup> Ri na'akeme man derne rakani Makromod Lalap Nin keneri hono'ok eni, moriwuku noro Ai, la Ai noro hi ramwali mahaku.

Enla ik kauroin nahenia Makromod Lalap moriwuku noro ika, ono Ai naledi Nina Roh maika me'e.

## 4

### *Roh ma namlolo noro roh hayakyaka*

<sup>1</sup> Wal'u na'ahoru man ya aramyaka. Meser nammori aile man wakuku ha ma ka namlolo, la mahar lalaa mamai lolo noho wawan me'e. Ende yon mi akim naili'il ri na'akeme ma na'aheni Makromod Lalap Nin Roh aile hi raram, maa koklolo ma'inau rir wanakuku leke mauroin Makromod Lalap Nin Roh nodi molollo hi, ee ka. <sup>2</sup> Modi kalla eniyeni leke mauroin roh ma namlolo noro roh ma ka namlolo: Lo'o ri ida na'aheni Yesus Kristus mai noho wawan namwali ri mormori, ai onne nin Roh mai nano Makromod Lalap. <sup>3</sup> Maa, lo'o ri namehin na'aheni Yesus kan mai noho wawan la ka namwali ri mormori naise maika, ai onne nin roh kan mai nano Makromod Lalap, maa mai nano Kristus Nin arwali. Mim dervedi me'e nahenia ler ida arwali onne lo'o mai noho wawan, maa lere eni maiyedi me'e.

<sup>4</sup> Enimaa ya an'u na'ahoru, mi eniyenihe Makromod Lalap Nine ri. Mi ka makani meser ma ka namlolo onnenihe, de mim rehiyedi hi, ono Makromod Lalap man aile mi akim nodi molollo narehi nano hayakyak man aile noho eniyeni. <sup>5</sup> Meser ma ka namlolo onnenihe noho wawan nin ri, de hir wakunu ha ma na'ono noho wawan nin wanakuku mamani, la noho wawan nin ri raram nodi derne rakani rira wanakunu. <sup>6</sup> Enimaa ik eniyenihe Makromod Lalap Nin ri, de inhoi ma nauroin Makromod Lalap, ai onne derne

nakani iknik wanakunu, maa ri ma ka namwali Makromod Lalap anan, kar derne rakani maika. Nano onne ik kauroin idewe inhoi nina Roh ma namlolo, noro idewe inhoi nina roh ma nodi ri laa yakanne.

*Makromod Lalap naramyak ananhe leke hi ida ma naramyaka ida*

<sup>7</sup> I wal'u na'ahoru man ya aramyaka, na'amoli ika ida ma naramyaka ida, ono raramyaka onne mai nano Makromod Lalap. Inhoi naramyaka ri, ai onne Makromod Lalap ananne, la nauroiroidin Makromod Lalap. <sup>8</sup> Maa inhoi ka naramyaka ri, ai onne ka nauroidin Makromod Lalap, ono Makromod Lalap penia raramyaka onno. <sup>9</sup> Ik kauroin Makromod Lalap naramyaka ika ono Ai nala Anan Kuru Mehe Lai Mehe mai noho wawan leke ik lernala or'ori dardari nano Ai. <sup>10</sup> Ende Nin raramyaka onne penia ma namlolo, iknik ka. Makromod Lalap penia ma naramyaka ika, la nala Anan namwali honoi kanani leke na'ohu nahala iknik dohohala.

<sup>11</sup> I wal'u na'ahoru man ya aramyaka, Makromod Lalap naramyaka ika rehi, de wa'an rehi ik ida ma naramyaka ida haenhi. <sup>12</sup> Ri mahaku kan do'onnala Makromod Lalap makun, maa lo'o ik ida ma naramyak ida, Makromod Lalap moriwuku noro ika, la Nin raramyaka penpenu kemkeme aile ik raram penia ik karamyaka ri kokkoo.

<sup>13</sup> Makromod Lalap naledi Nin Roh maika me'e, de ik kauroin nahenia ik moriwukuwedi noro Ai me'e, la Ai namwali mahaku noro ika. <sup>14</sup> Ai mehem do'onedi la kukumaka nahenia Makromod Lalap nala Anan mai leke namwali Rai Ma

Nala Or'ori Dardari lolo noho wawan. <sup>15</sup> Inhoi ma ne'e nahenia Makromod Yesus onne Makromod Lalap Anan, Makromod Lalap namkene moriwuku noro ai, la roro ramwali mahaku. <sup>16</sup> Enpenia ik akin namkene ono kauroinedi nahenia Makromod Lalap naramyaka ika.

Makromod Lalap onne penia raramyaka onno, de inhoi nin morimori naramyaka ri mamani, ai onne noro Makromod Lalap namwali mahaku, la Makromod Lalap moriwuku noro ai. <sup>17</sup> Nano panaeku eni ik kauroin nahenia Makromod Lalap Nin raramyaka penpenu kemkeme aile maika leke yon ik kamka'uk rakan Lere Alam Hono'ok Kanail, ono lolo noho wawan ik mori naise Yesus haenhi. <sup>18</sup> Ri ma nauroin kokkoo Makromod Lalap naramyaka ai, ka namka'uk. Maa ri ma ka nauroin Makromod Lalap Nin raramyaka, ai namka'uk lernala dohohala nin hunukum. Raramyaka man penpenu kemkeme onne penia ma na'amoluloinedi kamka'uk onneni, de ri man lernaledi Makromod Lalap Nin raramyaka onne, ka ramka'uk me'e. Maa ri ma ka nauroin Makromod Lalap Nin raramyaka man penpenu kemkeme eni, ramka'uk makun.

<sup>19</sup> Makromod Lalap naramyaka ika nolu, penia ik karamyak Ai noro iknik ri heri ri wali. <sup>20</sup> Lo'o ri ida na'aheni, "Ya aramyaka Makromod Lalap," maa ai kan suk walinhe, ai onne napoho. Lo'o ri ida ka naramyaka walinhe man an dodo'on, hi'ihewewi ai naramyaka Makromod Lalap man ai kan dodo'on? Onne ka namwali wake'e. <sup>21</sup> Enla, Makromod Lalap komdere ika na'ahenia, "Mi ri ma naramyaka Maya'u, maramyaka mi walinhe

haenhi.”

## 5

### *Ri ma akin naili'il Makromod Lalap Anan*

<sup>1</sup> Inhoi akin naili'il nahenia Makromod Lalap kikanedi Makromod Yesus namwali Rai laa ewi-ewi, ri onne namwaliyedi Makromod Lalap anan me'e. Enla inhoi naramyaka aman, ai naramyaka anan haenhi. <sup>2</sup> Ende lo'o ik hi'i wewhe Nina keneri hono'ok enihe, la karamyaka Ai, ik kauroin kokkoo ik karamyaka Makromod Lalap ananhe haenhi.

<sup>3-4</sup> Namlolo kokkoo ik karamyaka Makromod Lalap, horo ik derne kakani Nin keneri hono'ok. Ri na'akeme ma namwaliyedi Makromod Lalap ananhe rehiyedi man ailanna noho wawan, de kan sus lernohi keneri hono'ok onneni. Ik akin naili'il Yesus, de Ai nala ruri pe'el maika leke rehiyedi man ailanna noho wawan eniyeni. <sup>5</sup> Inhoi rehiyedi man ailanna lolo noho wawan eni? Ri ma nauroin kokkoo nahenia Yesus namwali Makromod Lalap Ananne.

### *Makromod Lalap kukumaka nahenia Yesus Ananne*

<sup>6</sup> Yesus Kristus penia mai noho wawan, la An laa oir raram leke rin ulutade, la An maki lolo au kekiyowok. Kan mai leke rin ulutade rodi oir mehe, maa leke nala kemen maki la rarna nakliu haenhi. Enla Makromod Lalap Nin Roh kuku maka konohi maika nahenia onne na'akeme namwali, la ik kauroin Roh onne kan wakunu ha man sala.

<sup>7-8</sup> Kunuku maka wokelu aile: Makromod Lalap Nin Roh, oir, noro rare. Wokelu eniyeni rir

panaeku namnenehe la konohi maika kokkoo nahenia Makromod Yesus Makromod Lalap Ananne. <sup>9</sup> Nadedem ik derne kakani ri mormori kuku maka, maa wa'an rehi ik derne kakani Makromod Lalap Nin kunuku maka, ono Ai penia narehi nalewen ri mormori. Lolo kunuku maka wokelu onne Makromod Lalap wakunu panaeku ma na'ono Anan. <sup>10</sup> Ri ma akin naili'il Makromod Lalap Ananne, akin naili'il Makromod Lalap Nin kunuku maka wokelu onne, maa ri ma akin ka naili'il onne, na'aheni Makromod Lalap napoho. Ai akin ka naili'il Makromod Lalap Nin wanakunu ma na'ono Anan kemen. <sup>11</sup> Kunuku maka onne hi'i heheni: Makromod Lalap naledi or'ori dardari ma kan horu maika me'e. Anan penia or'ori dardari onno. <sup>12</sup> Ende inhoi kokaledi Anan, an lernaledi or'ori dardari me'e, la inhoi kan kokala Anan, kan lernala or'ori dardari onneni.

### *Or'ori dardari ma kan horu*

<sup>13</sup> Ya'u horok ha eniyeni na'akeme akuwala ki mi man akin naili'il Makromod Lalap Anan, leke mi mauroin kokkoo mim lernaledi or'ori dardari ma kan horu me'e. <sup>14</sup> Enpenia ka kamka'uk kakpali Makromod Lalap, ono An derne iknik lir napanak, horo nahenia inhawa man ik kapanak lernohi Nin honorok aki. <sup>15</sup> Ik kauroinedi me'e nahenia Ai nala inhawe man ik kapapanak, ono ik kauroin nahenia An dervedi iknik lir napanak me'e.

<sup>16-17</sup> Hini'i wenewhe man sala na'akeme namwali dohohala, maa dohohala aile ma ka nakoko rin maki laa ewi-ewi. Lo'o mim do'on walin ida hi'i dohohala onne, wa'an rehi mim hi'i lir napanak leke Makromod Lalap nala or'ori

dardari ma kan horu ai. Ya'u wekel dohohala onne mehe, maa dohohala namehin aile ma nakoko rin maki laa ewi-ewi. Ka'u hopon mim hi'i lir napanak leke Makromod Lalap nala or'ori dardari ri man hi'i dohohala onneni.

<sup>18</sup> Ik kauroin nahenia ri na'akeme ma namwaliyedi Makromod Lalap anan me'e ka radedem hi'i dohohala, ono Makromod Lalap Anan norle'ule'u norwaliwali hi, la Ai kan huri Hayakyak Makromon hi'i haida-haida man yak hi me'e. <sup>19</sup> Ik kauroin nahenia noho wawan eni na'akeme Hayakyak Makromon nodi molollo, maa maika, ka! Ik kamwaliyedi Makromod Lalap Nin ri me'e. <sup>20</sup> Maa ik kauroin Makromod Lalap Anan maiyedi me'e haenhi, la nala woroin maika leke kauroin nahenia Ai penia ma namlolo. Ik moriwuku noro Makromod Lalap ono ik moriwuku noro Anan Yesus Kristus. Ai penia Makromod Lalap ma namlolo, la ma nala or'ori dardari ma kan horu.

<sup>21</sup> Ya an'u man ya aramyaka na'ahoru, madiyaka mi leke yon hoikani aukerhe man hi'i mi ko'u nano Makromod.



## **Makromod lalap lirna wawan New Testament in Kisar**

copyright © 2008 Yayasan Sumber Sejahtera

Language: Kisar

Translation by: Wycliffe Bible Translators, Inc.

### **Copyright Information**

© 2008, Yayasan Sumber Sejahtera. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Kisar

**© 2008, Yayasan Sumber Sejahtera. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files  
dated 29 Jan 2022  
97b91eda-c10a-5f87-8fec-cc597a825a4